

هي لحظه
بتنفجر فيها المشاعر
و تحس فيها انك عبيط
سنين حياتك راحت عليك
و انت عامل .. قال حويط
قلبك بيتحمل
كل اسائه من البشر
و كأنه اكبر م المحيط
عايش لوحدك غربتك
و لا حد حاسس كربتك
و بتبني بين الي تحبة
و بين مشاعرك .. ألف حيط
و لما تقول : خلاص يا ناس
مافيش نصيب

يقولوا عليك
إنسان غريب
عامل حكاية و مشكله
من أمر بسيط
ميعرفوش !.
إن الجراح من عمرهم
كانت تزيد مع بعدهم
تقطع مشاعري و عندهم !.
مطلعش ليها في يوم أطيظ
مركونه تداري في بعضها
و القلب وحده يضمها
هو غطاها و فرشها
و اكبر و جع !.
لما الجدع !.
قلبه يكون للجرح فرش
و لما يشيل همه سنين
و الهم حمله ميتوصفش
تشرب معاه المر

و المشكله .؟
بتمر سنين العمر
و المعضله .؟
إزي السنين دي متتحسبش . ؟
تلاقي الحياه في المنتهي
حتي الحنين مات و أنتهي
و أكبر ندم .!
عمر انعدم .. و سنين ألم
علشان حبيب
ميستهلش

أنا هاختفي

أنا هاختفي لازم في يوم
و هاختتني كل الحاجات
كل الأمور الخاصه بيا
هاجيلكوا بين الذكريات
هاقولوا صفحه اتهكرت
بكره راح يدخل بغيره
و جايز حياته اتعكرت
و ماشي محتار فيه دليله
هو اللي جاي و لا اللي فات
قلبه يمكن فيه خسوف
هزمته شوية مشاعر
و احتمال كان الكسوف
أصله كان في الأصل شاعر
و احتمال يكون بخوف

و اللي كان فوق الظروف
و اتعلقت في كلامه البنات
الله اعلم باللي حاصل
في الخاص ما بينهم و الشتات
و يمكن تلاقوا !
بوست نعي في صفحتي
و يقولوا مات
و تقولوا أفضي لي خلقه
بكل كلمه كتبها قلمه
بكل الدقايق و الساعات
و تجيني دعوه بالثبات
و لا هاتقول ارتحنا منه
و من كلامه و من بواخته
مش باقي غير وجع السكات ...
قولولي دلوقتي ياريت
هاتقولوا يومها عليا ايه ...؟
هاتقولوا مفتقدينه , جازي ..!
بس مفتقدينه ليه ...؟